

Van onser vrouwen gheslachte


editie M. Gysseling

bron

Van onser vrouwen gheslachte. In: Instituut voor Nederlandse Lexicologie (samenstelling en redactie), *Cd-rom Middelnederlands*. Sdu Uitgevers/Standaard Uitgeverij, Den Haag/Antwerpen 1998.

Zie voor verantwoording: http://www.dbnl.org/tekst/_ons013mgys01_01/colofon.php

© 2012 dbnl



[Van Onser Vrouwen gheslachte]

- Hort hier van onser vrowen
Hare gheslachte te ghoeder t[ro]wen
Onser vrowen moeder hiet ver anne
Nv hoerter naer so hadde .iii. manne
5 Ic salse v nomen alleghader
Joachim hiet onser vrowen vader
Van hem sohadsoe onser vrowen
Dit was waer teghoeder trowen
Maer het was biden heelgen gheest
10 Dat soese ghewan doe alre meest
Want het was gheseit lange teuoren
Dat van ere maegt soude werden geboren
De ghods sone van hemelrike
Die coninc soude sijn van aerderike
15 Dat was ihesus dier marien kint
Die ons allen heeft ghemint
Dies moeti sijn ghebenedijt
Embermeer in allen tijt
Verannen erste kint dat was marie
20 Die den gods sone drogh suuer ende vrie
Sident huwede veranne ende gewan
Cleopase enen andren man
Dar bi hadsoe no min no me
Marien die men hiet cleopase
25 Dese marie so huwede ghinder
Ende gewan .iiii. heelge kinder
Bi alpeuse die goet man was
Also ict inde scrifture las
Joseppe iacoppe symeone

- 30 Ende iudase die ter duegt was gew[one]
 Want dese iudaes hine was niet
 Die ihesuse onsen here verriet
 Noch verstaet ende hoert
 [Na] dat hier volghet voert
- 35 Salome was verannen derde man
 Dar soe de derde marie af gewan
 Die marie hiet salome
 So hadde saen der kinder [twe]
 Bi zebedeuse haren man
- 40 Deen dat was sente ihan
 Die men heet ewangeliste
 Dat segt scrifture diet wel wiste
 Sente iacob wasser oec een
 Die in galissien op enen steen
- 45 Voer ouer die wilde ze
 Aldus wilt ghod no min no me
 Ver annen dochter kinder dat waren
 Nv merct meerre ende minder tewaren
 Waer sach noit man des ghelike
- 50 Ghescien yeweren in aerderike
 Want in iherusalem was soe gheboren
 Van verannen die ghod hadde vercoren
 Jnden temple wassoe mengen dach
 Die talreerst suuerheden plach
- 55 Na haerre wet leefde sente clare
 Die men nu hout al openbare
 Want daraf quam hare goeds genoegh
 Dat soe den gods sone gedroegh
 Daer starf soe biden hospitale
- 60 Doe quamen die apostele altemale
 Ende droeghense woch al enen pat
 Vte iherusalem tote in valle iosephat